



§. I.

DE podagra retropulsa acturus vocis rationem haud negligo. Ποδὸς ἄγρα (a) captura pedis est, nomen ergo ipsum pedis vsum interceptum determinat. Idem morbus alios articulos si occupat, vox ἄγρα cum nomine articuli affecti iungitur, ita vt modo ischiagra, modo gonagra, modo chiragra appelletur. Merito autem eiusmodi denominationes praeferuntur, tanquam memoriae optime succurrentes, quae cum re generatim determinanda aequae conueniunt.

§. II.

At rei ipsius plenior figenda idea est. Definitur podagra, quod sit dolor diuerso gradu atrox & lancinans in loco neruoso & tendino-

(a) Ita LUCIANVS in Tragopodagra ipsam sistit, sui nominis rationem reddentem: παρα δὲ τοῖς πολλοῖς βροτῶν ποδάγρα καλεῖται γιγνομένη ποδῶν ἄγρα.